

Lettre Jèrriaise (29) Sanm'di lé 2 Dèzembre 2023.

Bouônjour, bouonnes gens et ch'r'est mé, David Mathet, tch'a l'pliaïsi d'vos présenter la Lettre Jèrriaise acouo eune fais, aniet Sanm'di lé 2 d'Dèzembre, 2023

Lé jour dé naïssance dé ma méthe. Oulle éthait 109 ans si oulle avait vêtchu. Pon qu'ou l'éthait voulu. Ou' mouothit i' y' à dgiêx ans et par chu temps-là ou' n'avait autcheune ambition dé r'chéver eune carte dé la Reine.

Mais avec la saison d' Noué tch'apprache mes mémouaithes ont r'touônné à des Noués d' man êfanche. J'fus né juste auprès l'Otchupâtion, au mais dé Janvyi '46, ch'est pouortchi j'avais presqu'un an pour man preunmié Noué. Mais quand même j'm'en rappelle pon fort. Pus tard i'm' disaient

qué Papa Noué vos apportait p'têt' eune orange, un morcé d' tchèrbon et eune p'tite jouette ou deux – imaginez nos p'tits êfants au jour d'aniet! Jé n'sais pon, mais j'sais bein tchi 'taient tous dans eune cauche à mon péthe! Pus tard, j'aviêmme, man p'tit frêthe et mé, eune spéciale cauche en filet pour lé bouônhomme à remplyi.

Les temps 'taient acouo difficiles pour nos pouôrrs pathents, et parfais nos d'sithes né pouvaient pon réussi. Quand j'avais quatre ou chinq ans, j'avais d'mandé pour eune trompette, mais il eut à m'apporter eune 'ukuleli', qué, ma fai, j'ai acouo! La trompette tchi veint l'année d'après, 'tait en pliaistique, et malheureusement bûchie tchique temps pus tard.

Bein seux i' n'fallait pon être êvilysi quand Papa Noué arrivait. Ch'tait eune gêne, et

eune année j'eus un mauvais rêve, tch'i 'tait d'but auprès dé man liet, illeuminné avec un rouôge corps tout draït et eune ronde tête bïanche, bein comme les pompes à pétrole Esso, dé ches jours-là, si ou vos r'souv'nez. Oh, ch'tait chotchant!

Tout d'même i' y' avait d'belles décorâtions: des chaînes en papi dé plusieurs couleurs, tch'avaient fait sèrvi plusieurs fais et p'têt' un mio trilyies, mais n'importe. Eune fais lé bouais d'noué n'tait pon un sapîn mais eune branque dé housse. Jé n'craïs pas qu' ma méthe en 'tait trop împressionée! Eune année pus tard, chutte fais avec un p'tit sapîn, j'avêmes dé vraies chandelles parmi les décorâtions sus l'bouais et, mon doux d'la vie, i' faillit dé l'mettre à feu! L'année d'auprès j'avêmes dé belles petites clioches illeuminées à l'êlectrique; bein pus sauf.

Lé dînnier d'Noué 'tait pus sîmpl'ye qu'au jour d'aniet, avec lé râtionnement, seulement eune sorte dé viande, etc. et pon bein difféthent qué l' dînnier rôti du Dînmanche. Mais j'tions bein satisfais. Et pis, bein seux, pour lé thée, i' y' avait la belle gâche-à-chucre dé Noué, bïanche et rose, avec la pâte d'almandes – tout à fait un jour dé fricots! La vie 'tait pus sîmpl'ye entchiéthement, et p'être pas eune si mauvaise chose?

J'espéthons p'têt' dé vos vaie pus tard aniet à L' Églyise dé St. André dans la Salle, à deux heuthes et d'mie, au Sèrvice des neu léçons et cantiques dé Noué; tréjous eune belle arlévée, suivie d'un bouon p'tit thée, avec p'têt' vouot' preunmiéthe gâche dé Noué! Tchi qui sait?

Pour achteu, j'vos souhaite à bétot et bouonne santé. À la préchaine.